

**Sekretáriu Estadu Konseihu Ministrus
no Porta-Vóz ofisiál Governu Timór-Leste nian
Ágio Pereira**

**20 Janeiru 2010
Dili, Timór-Leste**



**Timór-Leste mak di'ak liuhotu iha Ázia-Pasífiku kona-ba Transparênsia iha
Jestaun Petróleu**

“Revenue Watch” ka Observadór kona-ba Reseitas, haklaken katak Timór-Leste mak oras ne'e lidera iha rejiaun Ázia Pasífiku tomak kona-ba boa governasaun/jestaun iha setór petroleum liuhusi esforsus ne'ebé la'o tuir duni mekanizmu internasionál hanaran **Extractive Industries Transparency Initiative (EITI)**, ka **Inisiativa Transparênsia iha Indústrias Extrativas**, nu'udár organizasaun ida ne'ebé define tiha ona padraun globál kona-ba transparênsia iha petróleu, gás no setores minerais seluseluk.

EITI rekere atu kualkér Nasaun tenke servisu ho sociedade sivil no empresas privadas atu bele alkansa nível transparênsia iha jestaun ba rekursus naturais Nasaun nian. Atu bele simu estatutu EITI nian, Nasaun ne'e tenke sai hanesan kandidatu ne'ebé preenxe ona indikadores xave haat hafoin sei prezisa tan tinan rua hodi kompleta Validasaun husi EITI no halo kompletu nia estatutu.

EITI iha rekizitus 18 ne'ebé Nasaun ida tenke kumpri atu bele deklara katak la'o tuir dalan. Timór-Leste agora iha ona faze finál atu halo kompletu nia prosesu ho parte independente ne'ebé halo validasaun, ne'ebé oras ne'e daudaun hala'o revizaun ba sistema governasaun/gestaun petroleum nian.

Hanesan parte husi prosesu EITI nian, ezije ba Timór-Leste atu forma grupu “multi-stakeholder” ne'ebé Sekretáriu Estadu Rekursus Naturais S.E. Alfredo Pires prezide, atu dezenvolve planu atividade kompreensivu ida, no publika Termus referênsia kona-ba Grupú Trabalho “multi-stakeholder”, no relatóriu EITI nian. Relatóriu EITI Timór-Leste nian lansa ona iha fulan Dezembru 2009 no fó sai liuhusi website EITI nian.

Prezidente EITI Peter Eigen dehan “Timór- Leste hanesan Nasaun mós ida ne'ebé halo uluk liu kometimentu ho EITI, no Grupú Trabalho “Multi-Stakeholder” mós servisu maka'as tebes atu asegura katak EITI bele apresenta relatóriu ne'ebé detalhadu ho kompletu kona-ba reseitas husi petróleu. Ha'u kongratula Governu no membrus Grupú Trabalho “Multi-Stakeholder” kona-ba rezultadus boot ne'e”.

Nune'e, EITI iha ona serka-de Nasoens 30 ne'ebé besik atu kompletu ona. To'o agora foin Nasaun rua maka kompletu lós ona. Hein katak to'o Marsu 2010 Timór-Leste mós bele halo kompletu ninian.

Dezde halo lansamentu ba relatóriu EITI Timór-Leste nian; Banku Mundiál no organizasoens independents sira seluk hahí tebes Timór-Leste tanba esforsus ne'ebé halo atu garante transparênsia no kontabilidade iha jestaun setór petroleum; liu-liu iha rekonsiliaun no publikasaun reseitas governu nian no pagamentus indústria mai husi petroleum, gás no setór minéral.

Sekretáriu Estadu Ágio Pereira dehan “papél ida ke boot tebes husi Governu Xanana Gusmão nian, mak atu proteje no jere didi'ak setór petroleum hodi fó benefisius ba rekurus nia na'in rasik, mak povu Timór-Leste tomak. Transparênsia no kontabilidade hanesan prioridade zave

KOMUNIKASIAUN

atu asegura katak rekursus ne'ebé refere no reseitas mai husi ne'ebá bele responsabiliza ka apresenta kontas ne'ebé loloos no bele halo tuir duni padroens globais kona-ba boa governasaun i Governu mós implementa halo di'ak. Ne'e mak marku miliáriu "milestone" ida ke boot liuhotu ba Governu no sosiedade sivil no sektor privadu hodi nune'e bele kontribui maka'as ba dezvoltimentu nasional." **FIN**

Atu hetan tan informasoens favor kontakta:

Ágio Pereira

+670 723 0011

[***agiopereira@cdm.gov.tl***](mailto:agiopereira@cdm.gov.tl)

ka vizita EITI website

[**www.eitransparency.org**](http://www.eitransparency.org)